



16.11.2022

UKA2022/83

Paneeraq Olsen, Naleraq

Innuttaasut tarnimikkut napparsimasut innuttaasut akornanni inooqataaqqilertarnerannut annertusaanissaq anguniarlugu tarnikkut nappaatilinnut immikkoortortaqarfik aammalu pinerluttunik isumaginnittoqarfimmi sulisut ilinniakkamik qaffassaqqiffiginnaasaannik immikkut suliaqarnissaq siunertarlugu Naalakkersuisut sukkanerpaamik Rigsmyndighed-mut attaveqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq Anna Wangenheim, Demokraatit)

Siunnersuuteqartumut Inatsisartunut Ilaasortamut Anna Wangenheim, Demokraatit, Naleqqaminngaaniit qujavugut.

Siunnersuut pingaaruteqartoq minnerunngitsumik tarnimikkut napparsimasut pinerluuteqarsimallutik pineqaatissinneqareernerata kingorna innuttaasut akornanni inooqataaqqilertarnerannut tunngasuteqarmat, tarnimikkut napparsimasut ikiortiminnik sullissisuminnillu paasineqarlutik ikiorneqarnissaat anguniarneqarmat.

Naalakkersuisoq akissuteqaammimi allappoq *”Maannakkorpiaq tarnimikkut nappaatillit pinerluuteqarsimasut katsorsarneqartussatut eqqartuunneqarsimasut 93-it missaaniipput.”* Kisitsillu ukiuni kingullerni qaffakkiartortoq aamma oqaatigineqarluni. Uani siunnersuuteqartup siunnersuutaanut Naalakkersuisut akissuteqaammimi aamma imatut allapput *”Pinerluttunut isumaginnittoqarfimmi piginnaasatigut amigaateqartoqarneranik, periarfissanik pioreersunik iluarsivigineqarsinaan-ngitsunik peqarnernik paasissutissaqanngilaq.”*

Tarnimikkut nappaatillit pinerluuteqarsimasut katsorsarneqartussatut eqqartuunneqarsimasut pineqaatissinneqarsimanermit kingorna innuttaasut akornanni inooqataaleqqinnissaannut Naalakkersuisut allannguutissatut siunnersuutaat Naleqqaminngaaniit taperserparput peqququtagalugu ilungersunartut akornutaasullu sukumiisumik qulaajaaffiginiarneqarmata aammalu suliniutissanik iliuserisassanillu siunnersuusiornissaq anguniarneqarmat.



Naleraq

Taamatut naatsumik oqaaseqarluta Naleqqamiit aalajangiiffigisassatut siunnersuutip ataatsimiititaliamut ingerlatinnissaa kissaatigaarput.